

# Minister Presidente Henny Eman riba Dia di Betico: "Vox Populi Vox Dei, esun cu no a siña obedecé voz di pueblo, no por ta un lider di pueblo"



**ORANJESTAD - Promer Minister Henny Eman den su discurso riba Plaza Betico Croes, a usa e oportunidad pa manda algun mensahe bon cla pa su colega politiconan y alavez manda un invitacion serio pa e lidernan di MEP pa forma un Gobierno sólido pa Aruba.**

Esun cu no kier tende mester ta sordo, pasobra e mensahenan tabata masha cla. Su referencia na bida di Betico y loke a caracterizá Betico como lider tabata casi perfecto. Ningun hende no por negligishá e referencianan aki como descripcion correcto di Betico y cu manera Henny Eman a bisa dirigiendo su mes na politiconan di Aruba "Mi ta invitá en especial esnan cu ta yamá pa dirigí e pueblo aki, pa busca den bida y trabao di Betico, inspiracion real pa nan tuma decisionnan clave cu ta necesario den e temponan aki."

Despues Promer Minister Henny Eman den un idioma simpel y cla a referí na dos característica di Betico cu

mester ta guía pa politiconan awe. E conclusion ta cu e palabra ta na e otro politiconan di Aruba awor.

## VOX POPULI VOX DEI

Promer Minister Henny Eman a referí na e expresion cu mas ta corda di Betico, Vox Populi Vox Dei cu Betico a tuma over di e abuelo di Henny, Henny Eman (sr.), pa muestra ta kico semper tabata e guía y meta di Betico. Esta di scucha voz di pueblo y haci loke Pueblo ta deseá. Den su propio forma Betico a scucha bon loke ta 'brotá' den curazón di su Pueblo y a traha duro pa realizá e anhelo di su Pueblo. Esta di por determiná su propio destino.

Henny Eman: "E realizacion di e anhelo di un pueblo, solamente ta posibel si tin e disponibilidad pa respetá e voz di pueblo. E filósofo Aristoteles a bisa " Esun cu no a siña obedecé voz di pueblo, no por ta un lider di pueblo". Vox Populi Vox Dei, Voz di Pueblo ta Voz di Dios, tabata e principio cu Betico a sigui usa despues di Henny Eman, difunto, pa exigí e realizacion di e deseo pro-

fundo di nos pueblo. Betico a carga e principio di Vox Populi pa e voz di nos pueblo worde respetá. Awe conmemorando y celebrando e dia di Betico, Vox Populi ta lanta atrobe den nos mente y nos ta realizá cu nos lidernan grandi ta worde cordá semper pa loke nan a parap'e. E sentimento profundo di nos pueblo pa para riba su mes y dicidí su propio futuro, a pone cu nos lidernan a muestra mundo cu si e pueblo di Aruba ta deseá di ta liber, esaki ta sagrado y mester worde respetá. No tin ningun forza cu por bai contra loke Pueblo a expresá como su anhelo. Ya setenta aña pasá nos Pueblo a sinti cu nos mester sali for di e sistema central cu tabata worde goberná for di Willemstad. Nos Pueblo a scohe pa ta liber pa dicidí riba su mes loke mester ta e rumbo di nos país. Granjunan di tera a sali na vanguardia di e deseo di nos Pueblo. Betico tabata vociferá loke tabata biba y brota serca nos hendenan. E voz di Pueblo den un democracia semper mester ta e voz cu ta worde scuchá y respetá y e ta exigí un lider grandi pa defendé e voz di pueblo y percurá pa e deseonan di Pueblo worde realizá. Elucha di nos pueblo pa haya e rumbo di nos país den nos man tabata un lucha largo y difícil. Betico awe mester ta un inspiracion pa nos carga e principio di Vox Populi Vox Dei." Cu e palabranan aki Henny Eman no solamente a muestra kico semper mester ta e guía pa politiconan, pero den un halá el a kita for di mesa tur e buya barata cu pa añanan caba y specialmente den último simannan ta worde hací cu e Status Aparte di Aruba. Den poco palabra Minister Presidente Henny Eman a muestra cu hamas Aruba lo por perde algo di su Status Aparte, si no ta deseo di Pueblo. Y e como político ta worde guiá dor di esey.

## FIRMEZA POLITICO

E otro referencia bon cla cu Henny Eman a haci na bida di Betico cu ta un les pa politiconan awe, ta su caracter di firmeza. Cu e referencia aki Henny ta

muestra cu ta solamente e interes di Pueblo y ningun otro por ta den mente di politiconan, aunke mester para firme pa por haci y actua asina. Henny Eman: "Betico mester a bringa contra murayanan di otro opinion. E mester a para fuerte contra tur sorto di influencia di afó pa cambia su direccion. Pero como lider el a para firme y na final a convencé esnan cu tabata oponé, pasiguié densu idealnan. Den política e firmeza y determinacion pa mantené e opinion cu ta husto pa nos pueblo

contra tur interesnan otro, cu hopi bez tin un influencia grandi, ta haci e diferencia entre e lider político berdadero y e político cu ta duna preferencia na interesnan propio. ....Awe mas cu nunca den un mundo turbulento, hopi bes e interesnan di gruponan, hasta serca di nos politiconan, ta otro cu e interes general di nos pueblo. Laga e ehempel di Betico riba un dia manera awe, traha riba nos pa nos fiha nos posicion pa futuro." Eman a expresá den su discurso. □



*Awe riba dia International di  
Douane mi kier felicita nos cuerpo  
di douane y tur su miembronan.  
Un danki sincero ta bai pa boso pa e  
trabow cu boso ta eherce na bienestar  
di nos pais.*

*Den nomer di Gobierno di Aruba  
mi kier alaves jama un cordial  
Bonbini na e miembronan di e  
cuerponan di Douane di Antillas  
cu bin celebra e dia special aki na  
Aruba.*

*Masha pabien na boso tur.*

*Ministro di Finanzas  
Armand Engelbrecht*